

Tumpuan kepada pembangunan usahawan Sabah

KOTA KINABALU: Kementerian Pembangunan Usahawan (KPU) akan memberi penekanan kepada pembangunan usahawan Bumiputera di Sabah dan Sarawak supaya mereka tidak jauh ketinggalan dengan rakan-rakan di negeri-negeri lain, kata menterinya Datuk Seri Mohamed Nazri Abdul Aziz.

"Saya tekankan Sabah dan Sarawak, kita perlu lakukan lebih...mereka kettinggalan jauh dibelakang," katanya selepas majlis menadatangani memorandum persefahaman di antara kementeriannya dengan Perbadanan Pembangunan Ekonomi Sabah (SEDCO) dan Universiti Malaysia Sabah (UMS) di sini pada Isnin.

Mohamed Nazri berkata beliau telah mengarahkan kementeriannya supaya di bawah program latihan yang dianjurkan, peserta-

peserta hendaklah dipilih berdasarkan kuota 50 peratus untuk Bumiputera Islam dan 50 peratus Bumiputera bukan Islam.

Kementerian Pembangunan Usahawan akan menyediakan pelbagai kemudahan serta platform yang diperlukan bagi membangun dan menjayakan program mewujudkan usahawan Bumiputera yang berkualiti dan masyarakat perdagangan dan perindustrian Bumiputera, katanya.

Beliau juga berkata usaha SEDCO dalam membangunkan usahawan, secara tidak langsung membantu kerajaan mengurangkan kadar pengangguran di kalangan Bumiputera kerana apabila mereka menjadi usahawan kelak, mereka akan menjana peluang pekerjaan untuk orang lain.

Di bawah memorandum persefahaman itu KPU, SEDCO dan UMS akan

berganding bahu dalam melaksanakan Skim Pembangunan Usahawan Siswazah Bumiputera Sabah.

Skim Pembangunan Usahawan Siswazah Bumiputera yang dilaksanakan SEDCO itu melibatkan seramai 20 graduan universiti yang akan mengikuti satu program latihan oleh UMS melalui pembiayaan daripada KPU.

Di antara program latihan di bawah skim itu ialah kursus intensif mengenai keusahawanan selama 8 minggu di UMS, program sangkutan selama tiga minggu di syarikat-syarikat swasta dan milik kerajaan.

Lima minggu berikutnya adalah untuk para peserta menyedia dan menghasilkan Rancangan Perniagaan Yang Bolehlaksana untuk dibentangkan kepada ahli panel penilai yang dilantik.— Bernama